

Las perspectivas economicas sa turblan

Prognosas davart la conjuntura da la grupa d'experts installada da la confederaziun


DA MARTIN CABALZAR

■ **La grupa d'experts installada da la confederaziun cun l'incumbensa d'elavurar prognosas economicas vegn a la conclusiun che la conjuntura vegnia a sa turblar en il decurs dals proxims quartals.** Tenor *Eric Scheidegger*, il manader da la direcziun per politica economica en il Seco, vegn l'economia mundiala probabel a sa sviluppar main ferm che quita fin uss. Consequentmain creschian la malsegirezza e l'intschertezza da las prognosas e sajan perquai grondas. Quai frainia tant l'economia d'export sco las investiziuns.

Nivels a l'orizont economic internaziunal

En il decurs da l'onn current èn la situaziun internaziunala e las perspectivas da la conjuntura svizra sa pegiuradas. La grupa d'experts prognostitgescha numadamain per 2019 in creschament dal product intern brut (BIP) da 0,8 pertschient, per 2020 dentant in tal dad 1,7 pertschient. La tendenza negativa da quest onn è d'attribuir per gronda part a l'effect da gronds events sportivs ch'han dentant pitschna relevanza conjunturala. «Quai sa manifestescha cunzunt en la reduziun dal creschament dal BIP per 2019, dentant cunzunt er en l'acceleraziun prevedida per 2020», scriva il Seco.

Dal martgà internaziunal quintan ins cun impuls in zichel pli pitschens che quai ch'ins aveva già prognostigà en la perioda precedent. Tranter auter datti indizis negativs da noss pli impurtant partenari economic, la Germania, che laschan presumar in plitost flavel segund semester 2019. Da quel pateschan principalmain las branschas fitg sensitivas per la conjuntura sco l'economia d'export e l'industria da metal e da maschinas. Franada supplementarmain vegn la conjuntura tenor Scheidegger era pervi da la valorisaziun pli auta dal franc svizzer en il decurs dals ultims mais. Summa summarum prognostitgescha la grupa d'experts ch'ils exports vegnian a crescer 2019 sut la media dals ultims onns.



Era la branscha da construcziun (auta) vegn ad esser pertutgada da las perspectivas economicas main favuraivlas sin plaun naziunal ed internaziunal.

MAD

Era la conjuntura interna patescha

Era per la conjuntura interna èn las perspectivas sa turbladas. Sin fundament d'in'occupaziun reducida da las capacitads da produziun, da la reduziun da las incaricas inoltradas e da la malsegirezza che regia actualmain sin plaun economic èsi da quintar che las interpresas fetschian mo precautamain investiziuns, quai malgrà che las cundiziuns da finanziaziun fissan actualmain favuraivlas. Per las investiziuns sin il sector da construc-

ziun èn las prognosas medemamain onz precautas. Il dumber creschent da localitads vidas ed il dumber reduci da lubientschas da bajegiar èn indizis che la dumonda è actualmain saziada, cunzunt sin il sector da construcziun auta.

Augment moderat tar il consum

Cuntrari quinta la grupa d'experts dentant cun in augment moderat tar il consum en la segunda mesadad da l'onn. Per 2019 duess l'occupaziun crescer a mo-

da solida cunzunt en il sector da servetschs. La dischoccupazin vegnia probabel a sa stabilisar sin bass 2,3 pertschient. Ultra da quai vegnia l'inflaziun diminuenta (chareschia 2019: +0,5%) a rinforzar la forza da cumpra dals tegnairchassas.

Tenor il manader dal ressort da conjuntura tar il Seco, *Ronald Indergand*, duess la conjuntura sa revegnir mo plaunet e levat l'onn proxim. Per l'ina sorta la grupa d'experts da la supposi-

ziun ch'il creschament economic sa manifesteschia pir cunter la fin da l'onn. Sortind da l'imaginaziun ch'i na dettia betg in'ulteriura escalaziun considerabla dals conflicts commerzials internaziunals, saja da quintar ch'i dettia tscherts novs impuls tant per il commerzi mundial sco per l'economia d'export da la Svizra. En il medem mument quintan ins cun ina recuvrada moderada da las investiziuns, quai ch'ha alura er in effect positiv sin la dischoccupaziun. Era tar las pajas quintan ins cun in zichel dapli dinamica.

Ristgs conjunturals internaziunals

«Tar la conjuntura mundiala surpaisan ils indizis ed ils ristgs da digren claramain», di Indergand vers La Quotidiana. Cun l'introducziun da novs dazis tras ils Stadis Unids per rauba da consum or da la China saja il conflict da commerzi internaziunal escalà danovamain. Sche quest conflict avess anc da s'extender saja da quintar che la conjuntura vegnia anc flavelentada supplementarmain.

La malsegirezza politica saja vinavant gronda, d'ina vart pervi dal Brexit e da l'autra vart pervi da la relaziun intscherda da la Svizra cun la UE en connex cun la cunvegna da rom. In Brexit dischordinà avessia in considerabel effect nuschai-vel sin la conjuntura europeica ed uschia indirectamain era sin la Svizra, constatescha Indergand. Plinavant avessian in pegiurament u in agravament da las relaziuns da la Svizra cun la UE in considerabel effect negativ sin l'attractivdad da lieu sco era sin la prontadad d'investiziun da la Svizra.

Considerond questa malsegirezza e la situaziun fragila en intgins dals novs pajais industrials, sco per exempel l'Argentina, è il ristg per turbulenzas sin il martgà da finanzas creschì l'ultim temp. Plinavant pudessia il squitsch da revalutar il franc svizzer crescer sch'i dettia ulteriurs ristgs da pli gronda dimensiun cun in effect franont sin l'economia d'export, punctuescha Indergand.

En Svizra restia en vista a las disparitads latentas vinavant il ristg d'ina ferma correctura sin il sector d'immobiglias.